




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

TESEMA 2016

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

O le 'Api Tusitusi a le Fafine na Alofagia e Iesu

mai le tusi:

THE DAY I MET JESUS

(O le Aso Na Ou Feiloai ai ia Iesu)

O loo sasala lava le manogi o le u'u
sausau i o'u lima - lima na mili ai le

u'u e sili ona taua ia te a'u, lea ua ou
ofoina atu ma le fiafia mo le e sili atu

ona taua. Peita'i, o lenei ua fai lenei
u'u ma faata'imuaga o le oti.

O loo o'u tagi a o o'u faalauina nei
upu. Ua latou avea la'u uo, ma le
Mesia ina ua mae'a se faamasinoga e
le amiotonu. Na ta'ita'i i Iuta i le motu
o tagata o ave a latou uatogi, ma
tamaloloa o iai a latou sulu, ma latou
faalataina Iesu i se aga faamolemanava
- o le sogi, na fai mai ai nisi ia te au.

E loto leaga ma matatau'a. Sa ou
matauina lava nei uiga i ala o Petania,

faaauau itulau e 2

E te le talitonu i le ituaiga tagata na avea ma uluai misionare o le Tala Lelei

E tele lava ina tatou manatu, o soo e
to'a sefulu ma le lua, o i latou ia o uluai
misionare o le Tala Lelei o le
Faaolataga. Fai mai foi isi, o le fafine
Samaria na alu e utuvai i le vai'eli, na
oo ina tatia'i ai ana faguvai ae tamo'e
e tala'i atu le tala i le tagata ua ia
faamatala ana mea lilo.

faaauau itulau e 9

O Malaga o le Faatuatua i "IERUSALEMA FOU"

Mai matamatagi uma o le atunuu e
gasolo mai ai, i le fia selau maila, e
seevae patipati isi, ae le seevaea isi.
Ae faatutu uma le latou savavali i le

faaauau itulau e 9



*O se ata o le galuega o le Malumalu Iupeli i Malua,
na pu'eina i le vaiaso muamua o le masina o
Ianuari 2017..*

O le 'Api Tusitusi a le Fafine na Alofagia e Iesu,

mai le tusi:

THE DAY I MET JESUS

(O le Aso Na Ou Feiloai ai ia Iesu)

mai le itulau muamua

lo latou matau'a ia Iesu a o ia faia ni mea latou te le mafai ona fai - o vavega. O le faamagalō. O le toe faafo'i o le vaai i le na tauaso. O le toe faafo'i o tagata ua malolosi i o latou aiga. Ma lo'u tuagane ua toe ola mai nai e ua oti. Na o Iesu na te mafai ona faatonu le oti ia toe ola. A o lenei ua tuuina i le falepuipui, e faatali ai lona oti. Ma o le a ou tagi i lo'u olaga atoa aua e leai so'u malosi poo so'u mana e pulea ai le tuugamau. Tasi a le mea ua ou mautinoa o le a tuuina atu Iesu, ma o lona i'uga e le lelei. O le mea lena ua liua ai nei le uu manogi i o'u lima ma u'u o le faata'imuaga o le tanuga.

Ae a ou toe liliu ma tepa i tua ou te iloa manino atu ai filifiliga a le Atua. O ia filifiliga e fenumia'i i nisi taimi, ae i'u ane lava i le manino e pei ona faamalamalamaina se aso o le Paseka e le la le 'auaoo.

O la'u tala e tolu ona vaega; e tolu tala. O le numera tolu o le numera atoatoa lea, o le numera foi o le tolutasi. O le mea lena ou te faatauaina ai le u'u manogi. Aua o lesonea ua ou maua e le mai se perofeta, poo se patele poo se tupu, ae pupuna mai i mafutaga ma lo'u alii o Iesu, o le e ona ia tofi uma ia na ou laulauina. Na ia viivii mea na ou fai. Na ia lu'iina foi a'u. Na ia faatauaina foi o a'u. Ua ou matua faafetai lava ona na ia sailia o a'u ma ia faamamaluina o a'u.

O le Tala Muamua. E le'i 'alo si o'u tuagane o Lasaro i lona valaauina o ni tamaloloa se toatele i lo matou fale: tamaloloa fai'a'ava, vae palapala, fia 'a'ai. Na sosoo atu lea mea i le faamaloloina o lo matou tama o Simona e Iesu le Nasareta. Ua papa'e ona lima i le ma'i lelela. Ou te talitonu e le o toe umi ae oo foi ina faafaleeseina o ia e tagata o le nuu, o se mea o matou faatalitali iai ma le popole, aemaise lava o lea faato'a te'a atu foi le oti o si o matou tina.

O le mea lena ina ua tamo'e mai lo'u tuagane o Lasalo ma faailoa mai, ma maligi fiafia ai loimata o lo matou tama, ona ma tamomo'e lea iai ma lo'u uso o Mareta e faafetaui. Na ou faapea a'u o loimata o lo'u tama e mafua 'ai ua faatonuina o ia e le pulega a le malo e faaunu'ua i se motu tuufua mo tagata lelela. E talatala atu fusifusi o papala o lo matou tama, ua leai se mea, na o pa'u mananaia ua tuu mai i ona lima. Ona matou sisiva fiafia ai lea, ma matou vivii i le Silisiliese, matou o lo matou tama o Simona, o Lasalo, o Mareta ma a'u.

"O ai na faia lea mea?" o la'u fesili lea.

"O Iesu le Nasareta," o le tali lea a Lasalo.

"Iesu."

Pei o le suamalie o le meli i lo'u gutu le igoa na ta'u mai. Peitai ua uma ona ou faalogo i tala i le tagata pa'ia lea. E ta'u e isi tagata o le perofeta. Ae ta'u e le 'au mautofi o le lotu Iutaia o le faatupu faalavelave. Ae alalaga tamaiti ma fai mai o le fai vavega. Ua leva lava ona ou fia feiloa'i i le Alii, a o le faamamaina o lo matou tama mai lona ma'i, ua atili ai ona ou fia feiloa'i iai, e faafetai iai i lana faamalologa.

Ae te'i ua faate'ia mai a'u i se mea e pei o sa'u miti, ina ua musumusu mai lo'u tuagane o Lasalo, "Na ou valaauina le Alii ma ona soo i le taumafataga. E to'a sefulu ma le tolu le aofai."

Na mapuea Mareta, "Sefulu ma le tolu? I lo tatou fale? Afea?"

"Nanei!" O le tali lea a Lasalo e pei e leai ni tapenaga e faia mo le taumafataga.

Na tago mai Mareta ua toso atu lo'u lima, "E tatau ona sauni ni meaai," o lana tala lea. O lo'u uso e matua agalelei lava i tagata faapea. E pei o le tafe mai o lona afu le tafe mai o lona agalelei talimalo i taimi faapea. Na matauina e lo'u uso le fia 'a'ai o soo. O uiga o lo'u uso e pei lava o uiga o lo matou tina; ma e ou te alofa lava iai i

ona uiga le faailoga tagata, ma lona alofa faasoa ma fesoasoani. O Mareta na te fafaga tagata, ma ma'o'ona. O a'u ou te tautala i le upu faalototele, ma e sea sea ona ou iloa pe o oo atu i le lotu o le tagata le upu na ou tautala ai.

O le taimi o tatali le vela o le meaai, ae ou faalogoina loa lona leo mo le taimi muamua lava. Na ou autilo atu i le vai laupapa o le umukuka aga'i i lo matou fale, ma ou iloa atu ai tamaloloa e toatele. Ae foliga ese mai ai lava le Alii. Na ou musumusu ifo ia te a'u lava, "O Iesu!"

Na talie tamaloloa, ae fai mai Mareta, "Fai mai tala e le feafioa'i to'atasi le Alii. E malaga lava ma nisi o ona soo. O le mea lena ou te mana'omia ai lau fesoasoani." E fai lava lana tala ma sa'eu 'ulo mea' ai oi luga o le afi. Asu mai, tofo, ma toe sa'eu.

E ui lava ina malosi o le manogi o le kuka, ma le fai mai o lo'u uso se'i ou fesoasoani atu ia te ia, ae le'i alu iai lo'u mafaufau i lea taimi. E le'i mufaloina foi a'u i tiute faaleaiga, ma le Alii o Iesu. Leai! Na fetalai loa o ia tosina atoa loa iai lo'u mafaufau. Na ou faalogologo lelei ina ia ou maua uma upu o ana fetalai. Upu o le ola ma le lotu nutimomoia ma le malo o le Atua, ua tafe mai nei mai lona fofoga. Na ou talitonu ai o meaai ia na matou sauniunia e leai so latou malosi e suia ai le lotu, pe faamaloloina ai ni lelela. A o upu a lenei tagata e faaoloina ai.

Ou te le iloa pe o le a le mea na mafua ai. Ae ou te manatua lo'u femigoia'i. Sa talanoa mai foi Mareta e fia aumai se aniani, ona tu atu lea ma alu. Na ou faalogo atu o talanoa Iesu ma Lasalo, ae ou te le lagona lelei a la tala. A o le la talanoaga na mafua ai ona ou tu atu i luga, ma fai se mea e le masani ai.

Ua ou nofo i tafatafa o le Alii, pei ona fai e se tagata a'oga, o le nofo i

faaauau itulau e 3

O LE LAUGA

Tusi Faitau: Isaia 61:1-11

Roma 5:1-11

Matua: Isaia 61: f.10: “Ou te matua fiafia i le Alii, e olioli lo’u loto i lo’u Atua; aua ua na faaofuina au i ofu o le olataga, ua na faapulupuluina au i le ofu o le amiotonu.”

Manatu Autu:

O le Atua o le Pulupulu

E ese le manaia o le tusiga e le perofeta o Isaia o lenei mataupu. E pei o se tusitusiga a se tuisolo. E pei o se lagi lagi, poo se pesepese, a se fatupese. Ua ia faatusaina ai le olataga, i se ofu ua faaofuina ai o ia e le Alii. Ma na ia faatusaina foi le amiotonu, i se ofu pulupulu e faamafanafana ai le tagata i aso o le taumalulu.

E le o Isaia lea ua tago atu ofu

le ofu. E le o Isaia foi lea ua tago atu, ua pulupulu le ofu pulupulu. Fai mai upu o loo i le matua: ua na faaofuina au; ua na faapulupuluina au!

O fuaiupu muamua e tolu, ua faaali mai ai, le afio ifo o le Agaga o le Atua, i lana auauna, poo le perofeta, le tagata ua ia filifilia, ma ia faauuina o ia, mo le galuega ua finagalo le Atua e fai. Le galuega mo le fanauga a Isaraelu, faatoa faaolaina mai le tafeaga i Papelonia sa nofo pologa ai; sa sauaina ai; sa le maua ai se saolotoga e fai ai soo se mea latou te mananao iai, e tusa ai o latou o le nuu o le Atua.

Ua foi mai le tafeaga ma o latou manu’anu’a, faale-tino, ma faale-agaga. O tagata foi ua tumu i fesili, poo fea na iai lo latou Atua, a o nofo pologa i

latou i nuu ese. E pei lava foi ina tuufesili lo tatou atunuu, poo fea na iai le Atua, i le taimi o le mafuie ma le galulolo o le tausaga e 2009, faapea le afa o Eveni ma lologa na faaleagaina ai le tele o a tatou meatotino. Tatou te tuufesili foi i taimi e matua tigaina ai ma’i o nisi e pele ia i tatou, ma tatou fetagisi ai i le Atua mo se faamalologa, ae leai, e oo lava ina oti le ma’i.

O le mataupu foi lenei, e tusi faa-valoaga i le afio mai o le Mesia. Ma o fuaiupu muamua e tolu o le mataupu na faitauina, o fuaiupu foi ia na faitauina e Iesu, ina ua amata lana galuega, e pei ona tusia i le Evagelia a Luka 4:18-19. A o le mataupu foi lenei, e faasino foi mo Kerisiano, o tagata ua iai le Agaga o le Atua, ua faauuina ai i latou, o tagata faigaluega a le Atua. E tala’i le Tala Lelei i e ua tigaina, e fusifusi i e loto
faaauau itulau e 4

O le ‘Api Tusitusi a le Fafine na Alofagia e Iesu, *mai le tusi:*

THE DAY I MET JESUS

(O le Aso Na Ou Feiloai ai ia Iesu)

mai le itulau e 2

tafatafa o le A’oa’o, poo le Rapi - (Sit at the feet of the Rabbi). E le o a’u o se tagata loto tele; ou te iloa lelei foi tu ma aga a le nuu, aemaise lava i se mea o iai ni tamaloloa se toatele, ma Lasalo ma lo’u tama. Ui lava i lea e le’i alu iai lo’u mafaufau. Na o le tasi lava le tagata o loo o’u manatu iai - o Iesu!

Ou te le manatua pe o le a le mea na fai e tamaloloa ina ua ou nofo i vae o Iesu. Ou te le’i fefe fo’i i se otegiaga o a’u e lo’u tama. E le taumate e le’i pisa latou ona na talia e Iesu lo’u nofo i ona tafatafa (Sit at his feet). E le taumate ona na fetalai mai Iesu ia

matou uma, ma o ana fetalai o ni upu matou te le’i faalogo lava iai muamua. Upu o le alofa tunoa. O le ola. O le faamoemoe. O le manuia.

Oupu a le Alii na faamamaina ai a’u i le masiasi na ou tau’ave talu ina ou itiiti. Sa musumusu mai, *E te le aoga lava. O au agasala e le talia ai oe ona e auauna i le Atua.* E te le maua le loto alofa o loo i lou uso lea e ta’uleleia ai. E le lelei foi sau talanoa e pei o lou tuagane. Poo le mamalu o lou tama. Poo le natura ositaulaga o lou tina. O oe o le tagata mafaufau loloto. O oe e ese lava ou uiga.

Ana ou le nofo i vae o le Alii ou te le iloa o le leo i totonu o lo’u ulu e le o le

siufofoga lea o le Atua. O lo’u faalogo atu i ana upu na laga ai i lo’u loto se faamoemoe itiiti, o se fatu e le taumate e oo ina tupu mai o se vine, o se fugalaau, o le fuavine, o le ipu o le uaina lelei. E le taumate e iai se fuafuaga a le Atua mo a’u. A’u e ese lava mai isi tagata.

I ia taimi logomalie na faaali mai ai e Iesu lona soifua mo a’u. Lana misiona. Lona naunauta’iga. Lona mafuta mai faaleuo. Mata o faalogologo lelei isi a o fetalai Iesu? Na ia faamanatu mai ia te a’u o le malo na te faatuina o le a aliali mai i ni uiga e le ma faamatalaina e tagata. O e matitiva o le a mauoloa i le alofa. O e vaivai o le a i’u ina malolosi. O e na le amana’ia o le a alolofa atu. O i latou foi na mulimuli mai o le a mua’i taunuu i latou i matafaga o le manuia. O e tu’inanau i le faaeaina e ta’uvale i latou, ma e loto maulalo o le a siitia i latou i luga e Iesu.

Paga lea, e ese le taua ia Iesu o ona
faaauau itulau e 5

O LE LAUGA

mai le itulau e 3

momomo, ma tatalaina e ua fusifusia poo loo nofo pologa. E ta'u atu le alofa e oo mai o le Atua, e faamafanafana i e faanoanoa; le fiafia e sui ai le faanoanoa; le ofu e fai ai viiga e sui ai le loto faavaivai.

O latou ia o ta'ua, o loo tapu'eina faalaau toto e le Atua. O Laau o le Amiotonu, o le Faatoaga a le Alii, e fai mona viiga. O laau ia o loo faamatagofieina ai aiga, ma nuu, ma le lalolagi, i lo latou ola faauuina, ma faapa'iaina, mo le Alii. O e ua salamo mai a latou agasala, ma talitonu ma faatuatua i le Alii Faaola, ma lana amiotonu, e ta'u amiotonuina ai i latou. E ta'u amiotonuina ai i tatou.

O le tagata lava ia, o lona natura, o le agasala. O le sese. O le fefoifoia'i. O le le tutumau. O le le faamaoni.

A o le mea lena na ala ai ona maliu Iesu. Ona e leai lava se tasi e sao i le malo o le Atua, ona o le amiotonu a le Atua. A o lona alofa tunoa, alofa fua, ua ia faia ai le ala, e mafai ai. Na ia auina mai ai lona Atalii pele e toatasi, ina ia le fano soo se tasi e faatuatua ia te ia. Soo se tasi e talitonu ma faatuatua i le maliu o lona Alo i luga o le satauro, mo a tatou agasala, e faaolaina o ia.

“Aua ua faapea lava ona alofa mai o le Atua i le lalolagi, ua ia aumai ai lona Atalii e toatasi, ina ia le fano se tasi e faatuatua ia te ia, a ia maua e ia le ola faavavau.”

Tatou faalogologo i molimau a faifeau, i sauniga o maliu. E

te fiu e faalogologo pe tai ta'u maia ni leaga matuia o le tagata ua maliu, leaga ia ua leva ona tatou iloa ma matauina, ma e le tatau ai ona sao le tagata lea i le manuia i le lagi. E leai. E leai! Na o mea e lelei ai le tagata ua maliu. E tele lava tausaga o ou mafaufau iai i le itu lea. Poo le alolofa o faifeau i le aiga e ona le maliu. E lata mai nei lava se taimi na ou manatu ai, e fai sa'u mavaega i lo'u aiga, e aua le faia se molimau a le faifeau pe a ou oti. Aua na o mea lelei foi o le a ta'ua; ae leai lava ma ni tala i ni mea ou te matua leaga ai, a'u agasala matuia!

A ua galo ia te au le alofa tunoa o le Atua e ala i lona Alo. Na faasatauroina ai o ia ona o mea ou te le lelei ai. Ua ia tauaveina ai, i luga o le satauro, o'u leaga uma. O tatou leaga uma. Ma na faaofu ia i tatou i ofu o le olataga. Ma na faapulupulu ia i tatou i pulupulu mafanafana, o lana amiotonu, e pei ona tatou faitauina i le tusi o Roma.

O le Atua o loo tatou talitonu ma tapua'i iai, o le Atua o le Pulupulu.

O ia o le Atua e ona le Pulupulu o le Amiotonu ua ta'uamiotonuina ai i tatou ma tatou sao mai ai mai lona to'asa.

O le mea lena ua mafua ai ona fai mai o le tusi o Faaaliga: O ai ea i latou ia? O fea foi latou te o mai ai? O latou ia ua o mai nai le puapuaga tele. Ua taina foi o latou ofu, ma faasinasinaina o latou ofu i le toto o le Tama'i Mamoe! Latou te le toe fia aai, e le toe fia inu foi, e le ogotia i latou i le la, poo

se tasi vevela; e soloiesea foi e le Atua o loimata uma nai o latou mata.

Na faaali i le faletifaga o Polo i Tau'ese i Apia, se ata kaupoe, o Tim Holt, tusa ua 50 tausaga talu ai. O le manaia ia o le kaupoe ma lona ata. E fai lona pulupulu e masani ona tago atu ua felafoa'i mai le isi itu i le isi itu, ma lelelelele ai i le matagi, faato'a faaoso ai lana solofanua. Na ou manatua le tama kaupoe lea ma lona pulupulu, ina ua ou faitau i le mataupu lena i le tusi o Isaia. Ma ou manatu ai, o le Atua o tatou tapua'i iai, o le Atua o le Pulupulu. O le Atua e ona le Pulupulu; e ona le amiotonu; e ona le faamagaloga. E ona le faaolataga.

Mo Kerisiano lava latou o e faatuatua ma talitonu i le maliu o Iesu Keriso i le satauro, ua uma ona *cover* e Iesu mea latou te leaga ai. Ua uma ona totogiina a tatou sala, i le toto o le Tama'i Mamoe. Ma faaofuina ai ma faapulupuluina ai i tatou i le faaolataga ma le amiotonu a le Atua. Ma tatalo ai le Alii Faaola i lona Tama a o aga atu i lona faasatauroina ma augani: “Lou Tama e, o lo'u loto lena ia te i latou ua e foaiina mai ia te au, ina ia latou faatasi ma a'u i le mea ou te iai, ina ia latou vaaia lo'u mamalu na e foa'iina mai ia te au; aua ua e alofa mai ia te au a o lei faavaeina le lalolagi.”

“Ou te matua fiafia i le Alii, e olioli lo'u loto i lo'u Atua; aua ua na faaofuina o au i ofu o le olataga, ua na faapulupuluina o au i le ofu o le amiotonu.”

Ia manuia ona o Iesu. Amene.

Afemata T Apelu Aiavao AF

Faatonu o le Sulu Samoa

(E sui ai le lauga faatonuina e le'i taunuu mai)

O le 'Api Tusitusi a le Fafine na Alofagia e Iesu, *mai le tusi:* **THE DAY I MET JESUS** **(O le Aso Na Ou Feiloai ai ia Iesu)**

mai le itulau e 3

tagata. Se alofa ina a tele! Ou te iloa atu lava le alofa i ona fofoga. Ua ou ta'ele i le mafanafana o le alofa.

O le taimi lea na ou faalogoina ai le leo o Mareta. "Le Alii e, e te le manatu mai ea, ina ua tuu mai e lo'u uso ia te a'u e sauni toatasi? Ia e fetalai ane ia te ia, ia fesoasoani mai ia te a'u." Ua tuu lima o Mareta i ona puimanava, faapuiti ona mata, ma na otegia a'u i luma o le A'oa'o, a ua ou solomuli i totonu o lo'u tagata ma ou lafi ai e pei ona ou faia i le tele o taimi, taimi ou te manatu ai o a'u o le tagata malaga, poo se maumausolo i le lalolagi e leai se isi e malamalama ai, e oo foi ia te au ou te le malamalama i lo'u lava tagata. O leo ua ou faalogoina nei ua faamanatu mai ia te au ua le faia ou tiute e tatau ai, ma ua ou tuulafoa'iina lo'u uso, ma ua ou solia tulafono o le nuu, o ana tu masani, ma ou alu atu ua nofo i vae o le Alii. Ua ou toe te'i nei i le uiga o la'u mea lea ua fai, ma lagona maasiasi pe a, ua oo i lo'u uso o Mareta, lo'u tuagane o Lasalo, faapea lo'u tama ma tamaloloa fia 'a'ai o tumu ai le fale. Aemaise lava Iesu! Ai se inoino o Iesu i la'u mea ua fai, lo'u nofo i ona tafatafa!

Na o lo'u nofonono nei ma faatalitali se tali a Iesu. Se to'atama'i o Iesu. Le fafine le mafaufau!

Ae le'i suia uiga ma foliga o le Alii ona o la'u mea ua fai. Na o le silasila alofa mai ia te au. O ona uiga na ou lagona ai, o loo mana'o pea Iesu ou te nofo i ona tafatafa. Ma ou faatalitali i se toe otegiaga o a'u e lo'u uso o Mareta. A ua fetalai le Alii, "Mareta e, Mareta e, ua e popole, ma ua pupu lou loto i mea e tele; a o le mea lava e tasi e ao ina ia maua; ua filifilia foi e Maria lea mea lelei, e le aveeseina ia te ia."

Ua le toe pisa se isi i le fale. Ua ou mafanafana. Ua le otegiaina a'u, a ua faamalo mai ia te au. Ua talia e Iesu le mea ua ou nofo ai i ona tafatafa, ma ia faaogaina a'u o se faaa'oa'oga mo isi tagata i le fale.

Ua ou le popole nei i se otegiaga, a ua ou mafaufau i upu na fetalai mai ai le Alii - "...ua filifilia foi e Maria lea mea lelei, e le aveeseina ia te ia."

E tutumau uiga o le Iesu lenei, o le ua tatou ta'ua o le "A'oa'o." O se faamoemoe e faavavau. E lauga mai e ia o upu o le ola e soloisea ai le masiasi ma le faamaina ma le le amana'ia.

Ua matua mafanafana lo'u loto, ua suia, ma ua tumu i le faamoemoe. Ma ua ou iloa nei, ua ou iloa, o Iesu o le Mesia sa tatou moomoo iai. Ou te tuuina atu lo'u ola ou te mulimuli ai i le Atalii lenei o le Tagata, Alo o le Atua, le Perenise lenei o le Ola.

Ae iai le mea ou te faanoanoa ai. Ou te le'i faafetai iai ona o lona faamaloloina o lo'u tama.

O le Tala Lona Lua: O le aso lenei. E faapefea ona faapuupuupu atu se tala o le aso lenei? E le lava upu e faamatala ai le oti, le ola, ma Iesu. O lagona o le atuatuvaile, o moomooga, o le faanoanoa, o le mapuitiga. Ua fiva Lasalo e pei ona fiva lo matou tina. Ua tau manavanava. Ua popolevale Mareta. "Se aua le popole. O Iesu o le uo a Lasalo. E le mafai ona le sau pe a ave iai se fe'au," o la'u tala lea.

Ua ulu mai lo matou tama i le potu, ma ua popole ma fai mai, "O le a le mea e ma'i ai ae ou te le ma'i? E tatau ona ou ma'i ua ou matua." Ae na ou musumususu iai, "Faatuatua! O le la ua aami Iesu."

"Oi, Iesu." Ona 'ata lea, "E le mafai ona le faamalololoina e Iesu." O le upu lea a tama. A ua faasolosolo lava ina matua tigaina Lasalo. Ae ina ua fo'i mai le tama na alu e ave le fe'au ae le o o mai ma Iesu, ona matua oso ai lea o lo'u popole.

"Na ta'u le fe'au ia Iesu?"

"Toe!"

"O le a la sana tala?"

"Le'i fai mai ia a'u, ae na vaai i tamaloloa sa iai ma fai iai, 'E le i'u i le oti le ma'i o Lasalo. O le ma'i e ala

mai ai se viiga o le Atua, ia viia foi le Atalii."

Ua ou savali atu i lo'u tama ma Mareta ma ou fai iai, "E le oti Lasalo." Ma ou tago atu ua fusi mai uma la'ua e toalua ma ou musumususu atu iai, "Ua fetalai mai e le A'oa'o le upu."

Ona ma talatalanoa lea o ma'ua ma Mareta, ina ia le lagona mai e lo ma tuagane o Lasalo, i le ono na ona papa'i lava iai o Iesu ia Lasalo, ma talanoa foi i tala a isi fai mai na ona fetalai lava o le A'oa'o ona malolo lea o nisi ma'i. E le taumate o le uiga lea o le upu a Iesu. Na valaau mai Lasalo, "Pese se lua pese!" Ona ma pesepeseina ai lea o le *shema*, o le viiga masani a tagata Isaraelu, i tafatafa o lo ma tuagane: "Faalogo mai ia, Isaraelu e, o le Alii o lo tatou Atua, o le Alii na o ia. Ia e alofa ma anaana i le Alii lou Atua ma lou loto atoa, ma lou malosi atoa." Na pesepese mai foi Lasalo, e ui lava ina tigaina o ia. Ua matou taufai pepese nei matou e to'afa, ma augani i le Atua o Isaraelu ina ia lavea'i matou mai le oti.

Na ou fai atu, "E le mafai ona le sau le Alii. Ae tali mai Mareta, "Ia o fea o iai? Lea toetiiti oti Lasalo e lei sau lava."

O'u toe fai atu, "Aua le faia na upu e aliali ai lou le faatuatua i le Alii. Tatou pepese." Ona matou toe pepese lea, i pese o le lavea'iina o Isaraelu, o le vaeluaina o le Sami 'Ula'ula, pese o mea na fai e Tavita; o le tafeaga; o Neemia ma le fauina o le pa; o perofetaga a Isaia.

O le taimi lea na matou faalogoina ai le valaau a lo matou tuagane: "Avatu le viiga!" Ona to ai lea o lana manava.

Ua ou tagi. Tagi foi Mareta. Ae palasi ifo i lalo lo matou tama. Ua na o matou i lenei lalolagi; leai se tina; leai se tuagane; na o fafine e to'alua ma lo la tama ua toeaina. Taunuu atu le 'au fetagisi o le maliu ma fai le latou galuega o le fetagisi.

Ina ua oo i le taimi o le tanuga o le maliu, na matou faia mea manogi mo le tino o le tuagane; ae tasi le mea o loo o'u mafaufau iai: o fea Iesu? E le gata ina le sau e faamalololo lo'u tuagane, a o lea fo'i ua le sau i le falelauasiga. O lona uiga e pepelo upu na ia faia e uiga i se viiga o le Alii le Atua. O le a lea ituiga Atalii alofa o le Atua, ae tuu pea lana uo e oti? Ma

faaauau itulau e 7

(George Fox: 1624-1691)

O SIAOSI FOSI

O LE NA IA FAASA'OLOTO LE AGAGA

Ua Lava ia ia Sauaga!

Na matua faatoateleina tagata na mulimuli atu i tala'iga a Siaoisi Fosi, a o salalau atu ana a'oa'oga i matu o Egelani. Ua faatuputupula'ia le tele o aulotu a Kerisiano 'Quakers', ma fai a latou mafutaga ma fonotaga. O nei fonotaga ma mafutaga na tula'i mai ai ni alii ma tama'ita'i na manatu i latou ua valaauina i latou e le Atua mo lana misiona. Ua latou tuuina atu o latou taimi, e oo i fafine e iai a latou fanau, e feoa'i i le atunuu i mea ua latou talitonu ua faasinoia iai i latou e le Alii mo lana galuega, e folafola ma lauga ma a'oa'oga atu e pei ona faia e Siaoisi Fosi.

O le toatele o nei Kerisiano Quakers e leai ni o latou tofi (inheritance) poo ni meatotino mai o latou matua ma aiga e pei o Siaoisi Fosi e tele mea na tuufaasolo mai ia te ia e lona aiga ma ona matua. O lona uiga, e matitiva, e le'i a'oga fo'i. Ae na latou mafai ona faatosina tagata e toatele i soo se mea latou te galulue ai ona o le mana o le Atua na faatasi ma i latou. Ua masani i latou i le faalogologo i le musumusuga a le Agaga Paia ma mulimuli i lana ta'ita'iga. Na puapuagatia foi i latou e pei o Siaoisi Fosi, i le tele o taimi e sasaina ai i latou e tagata tete, ma oo ina tau le mafai ai ona latou savavali ona o o latou manu'anu'aga. Ae na latou manatu o se mea aoga lea mo se viiga o le Alii ato ma le mea moni.

Sa manatu Kerisiano Quakers o lo latou sauaina ma le tuuina i le falepuipui o se vaega lava o le latou galuega faamisionare. Ona

o pagota e tuu i se potu e tasi, o lea na faigofie ai ona fai o a latou mafutaga i le falepuipui, ma saili soo se avanoa latou te laugaina ai ma a'oa'oga atu e uiga ia Iesu Keriso.

Ona o le ofo o pule o le falepuipui ona o lo latou le mafai i sauaga sa latou fai i pagota Quakers ona tape o latou talitonuga, o lea na oo ina liua ai nisi o latou i tala'iga a Quakers.

Ina ua faalogo Siaoisi Fosi i le faafalepuipuiina o fafine, sasa, ma le faatauina atu i faiga faapologa o a latou fanau, na le mafai ai e Siaoisi Fosi ona taofiofi lona ita. I lona manatu, e na te mafai lava ona onosa'ia puapuaga ma sauaga, ae na te le mafai ona onosa'ia le sauaina o tama'ita'i ma tamaiti. Na alu atu o ia i e maufiofi ma na faaali iai le le sa'o o mea o faia i tama'ita'i Quakers ma a latou fanau. Na tusi atu foi o ia i le ta'ita'i o Egelani i lea vai taimi, o Oliver Cromwell, o se ta'ita'i'au iloga lona poto i mea tau taua, o ia foi na ia tete e nisi o pulega sau a le tupu, ma oo ina ave a ai o ia o se 'tupu e le'i faau'ua o Egelani. Sa tu malosi Olive Cromwell mo le saolotoga o tagata. Ina ua faalogo o ia i mea o faia e Siaoisi Fosi, ona ia avatu ai lea o le avanoa e oo vave mai ai la te talatalanoa.

O Tagata e le Mafaia ona Faatau i ni Tupe

O le feiloa'iga muamua a Cromwell ma Siaoisi Fosi na faia i Lonetona. Na faate'ia lava i le amataga ia Cromwell i uiga o Siaoisi Fosi. Na auina e Cromwell se satini e aami ia Siaoisi e sau, ae

na teena e Siaoisi lona alu atu i le taimi lea, ma lana faaaliga na fai mai ua faatonuina o ia e le Atua e alu muamua e auai i se fonu. Na ofo le satini i le teena e Siaoisi o lea valaau faaloalo e le lau maua, ona toe alu lea ia Siaoisi i le aso na sosoo ai.

Ina ua mau tala Cromwell i le tali mai a Siaoisi i lana valaau faaloalo, na matua ofo o ia.

Peitai ina ua ulufale atu Siaoisi i le taeao na sosoo ai, na ia alaga ai ma le leo tele, "Ia iai le manuia i le maota nei." Ona nofo lea i lalo ma amata faufautua atu ia Cromwell i mea e tatau ona ia faia e manuia ai le atunuu. Ona la talanoa ai lea i ni mataupu se tele tau i lotu, ma tali foi e Siaoisi fesili a Cromwell e uiga i Kerisiano Quakers.

Ina o le a tuua e Siaoisi le fale, ae tago mai Cromwell ua taofi Siaoisi, a ua maligi ifo loimata i ona mata, ma fai atu iai, ia alu atu pea i soo se taimi e mana'o ai la te talatalanoa.

Na ta'ita'iina atu e le satini ia Siaoisi i se potu tele e fai ai taumafataga o le a talisua ai ma Cromwell, o se faaloalo maualuga lea i Egelani i ia ona po. Peitai na fai atu Siaoisi i le satini, "Fai i le alii ta'ita'i'au ou te le 'ai i ana taumafa pe ou te inu i lana mea inu."

Ina ua ta'u atu ia Cromwell, ona faapea ifo ai lea o ia, "Ua ou iloa nei e iai tagata ua tula'i mai e le mafai ona ou tosina mai i ni meaalofa, mamalu, tulaga tofi, ni maota, e ui lava ua ou mafaia ona tosina mai nisi tagata o nisi tapua'iga Kerisiano."

Ina ua uma le failoa'iga lea a Siaoisi ma Cromwell ona aveese uma ai lea o moliaga aga'i i Quakers oi le falepuipui ae tatala, ma ua aveese uma foi moliaga tusitusia o iai faasaga ia Siaoisi Fosi.

mai le tusi: God's Generals,
tusia e Roberts Liardon
faamatala e
Afemata T. Apelu Aiavao

O le 'Api Tusitusi a le Fafine na Alofagia e Iesu, mai le tusi:

THE DAY I MET JESUS

(O le Aso Na Ou Feiloai ai ia Iesu)

mai le itulau e 5

pala i le tuugamau? Ae iniini mai lava lo'u mafaufau, e le taumate e iai se mafuaaga o lenei mea ua tula'i mai, e ui lava ua le taea e lo'u mafaufau.

E fa aso talu ona uma ona tanu Lasalo, ae tusi Mareta aga'i i le itulagi le la ma fai mai, "O Iesu!" E le'i faia sa'u tali ae ua tamo'e, ma faafeiloa'i Iesu. E le'i umi ae toe fo'i mai ma toso atu a'u. "O lea ua iinei le A'oa'o ma e mana'o e lua te talanoa."

Ona ou alu atu lea ma te feiloa'i. O loo ua faatali mai le Alii i tua atu o le aai i le mea na la feiloa'i ai ma Mareta. Ina ua vaai mai le 'au fetagisi o le maliu ua ou faanatinati ese atu, ona latou mulimuli atu lea ia a'u. Ina ua ou taunuu, ona ou faapa'u ai lea i vae o le Alii ma ou fai atu, "Ana e inei e le oti lo'u tuagane."

Na pulato'a mai le Alii ia te au. Na ou iloa atu ona foliga faanoanoa, alofa, ma matamata ita foi. Na tago mai i lo'u lima. "O fea ua outou tuu ai o ia?" O lana fesili lea i le motu o tagata. "Le Alii e, sau ia ina e vaai." O le tali lea a se isi o le motu o tagata.

Ua lolofi atu le motu o tagata i le mea maupu'epu'e o tanu ai Lasalo i le mea o ta'oto ai foi lo latou tina. Na ou fesili ifo ia te a'u pe o faanoanoa Iesu ina ua alu atu ua oti Lasalo. Na ou manatu e ono fai se lauga a Iesu e uiga i le oti. Ae leai sa na tala.

Ua vaavaai atu le motu o tagata i le A'oa'o. Ua leai se pisa. A ua ou faalogoina i le taimi lea le tagi o le Atua.

Ua tagi Iesu!

Fetagisi atu ai ma le motu o tagata!

Ua savali atu Iesu i le tuugamau.

"Aveese le maa ufiufi."

"Le Alii e, ua fa aso talu ona oti. E malosi le manogi leaga."

"Ou te le'i fai atu fo'i ia te outou tou te vaavaai i le mamalu o le Atua pe a outou talitonu mai ia te a'u?" E faatutu sa'o mai ana upu ia a'u. A ua si'osi'o matou e le motu o tagata. Ua ou manatua foi le toe upu a lo matou tama

i le to ai lana manava.

Ua o ane ni tamaloloa i le sii ese le maa ufiufi. Ua sau le manogi, ona ou ufiufi ai lea o lo'u isu i o'u lima. Ua vaai a'e Iesu i le lagi, ma faapuiti ona mata. "Le Tama e, faafetai i lou faafogaina mai o a'u, ae ou te tautala ma le leotele mo i latou uma o faalogologo mai nei, ina ia latou talitonu na e auina mai o a'u."

Na vaai atu o ia ia Mareta, toe vaai mai ia a'u, pei ua 'ata'ata lana vaai i le taimi lea a o fai ane, "Lasalo, ina sau ia i fafo." Ua fia pupuni o'u mata ona ou te le fia vaai poo le a le mea a tupu.

Ae te'i ua savali mai Lasalo mai le tuugamau, o fusifusi uma lona tino i 'ie. A o le mea uiga ese, e faalogoina atu lava le pesepese o lo matou tuagane. Na vaai mai Iesu ia a'u, toe vaai ia Mareta, ma lo matou tama, ma isi o potopoto ai, ma fai mai, "Tatala ona fusifusiga ma tuu ia e alu." Na ou momo'e atu ia Lasalo ma amata talatala fusi i lona ulu a o le la lava e pese, ma alaga mai, "O le Ola! O le Ola!"

"Ioe! Ioe! Aua o lea na e oti, a o lenei ua e toe ola mai." Na ou tago atu i ona alafau ma ou fai atu, "O oe!" Ae tali mai, "Ioe! E le o a'u o se aitu!"

O le Tala Lona Tolu: E te lagona lava i ou tino e le toe tutusa aso. Ua faamalumalu mai le ao pogisa e faapopoleina lou mafaufau.

Sa tatau ona avea lenei aso ma aso fiafia, i le mea fou ua tulai mai, ua toe ola mai lo'u tuagane i le lalolagi nei.

Na 'a've tala i le nuu o Petania o lona oti, ma lona toe tu mai nai e ua oti, ma oo atu ia tala i Iuta uma. E afe atu tagata ma tagotago i alafau o Lasalo, tata o latou gutu i se mea faatalitonu gata. A o lea fiafia na o mai faatasi ma atuatuvalega. O le faalata; o le matau'a; o le tu'inanau mai le loto leaga o faresaio.

Ua tago atu lo matou tama ma fusi mai lona atalii ma fai atu, "Si o'u

atalii!" A o tafe ifo ona loimata i ona alafau. Ua faalogoina le upu vavega o ta'u soo mai e le motu o tagata. Ua pepese tamaiti ma sisiva faataali'oli'o ia Iesu. Ua fetagisi fafine, a o le tagi o le ofo ma le le talitonu.

Ae ua faatasitasi ane le 'au faresaio ma taumusumus, ma tusitusi atu ia Iesu, ia Lasalo, ia Mareta, ia a'u, ma lo matou tama.

Ua mafaufau latou ua malosi tele le mana o Iesu, o se mea latou te le o maua. Ua ou mautinoa e oo lava ina latou fasioti ia Iesu.

Ua toe fai la matou taumafataga, a o toe ono aso oo i le Paseka, e faaali ai lo matou fiafia i le Mesia. Ua tafitifiti lava Mareta i le laulauina o le 'aiga. A o a'u, ua le atoatoa so'u fiafia. Aua ua ou iloa. O le taimi mulimuli lea ou te vaai ai i lo'u Alii o Iesu o ola. O lona lava ola e i'u i se faamoemoega lelei, o le faataunuuna lea o le finaglo o le Tama, tusa lava pe oti ai. Ma o lona oti o se mea lelei lea mo i matou o le a toote.

O le taimi lea na ou manatua ai le fagu alapasa, o le meaalofa a lo'u tina ia a'u a ua lata lona oti. O se fagu e tele ni a'u tupe e maua ai mo lo'u lumana'i. O lona tau e tusa ma le totogi o se tagata faigaluega mo le tausaga atoa.

A o le si'ufofoga o le Atua ua musumus mai ia te a'u: "E sili ona mana'omia e le Mesia lau uu manogi i lo lou mana'o."

O le fagu alapasa na oomi mai i lo'u fatafata e lo'u tina ma fai mai, "E te tua iai." Ona to ai lea o lana manava.

Na ou savali atu i le itu o le potu o iai le fagu alapasa, ua tatala, ma ou manavaina i totonu o lo'u tino lona manogi faamalie lagona. Ona ou savali atu ai lea i le mea o nofo ai Iesu ma ou nofo i ona tafatafa, ma amata ona liligi atu "le mea matou te tua iai" i aao o Iesu. Ua sosolo atu le uu nato i aao o le Mesia. Na talatala lo'u laulu ma mili atu ai le uu i aao o le Alii. O le uu na toote i le fagu, na ou liligiina i lona ao. O le taimi lea na ou talitonu ai, ua ou u'uina lo'u Alii mo lona tanuga.

O le taimi lea na ou faalogoina ai le leo o Iuta: "O le uu lena e tusa lona tau ma le totogi o le tagata faigaluega i le tausaga atoa. Sa tatau ona faatauina atu ma foaiina atu le tupe mo

faaauau itulau e 8

E te le talitonu i le ituaiga tagata na avea ma uluai misionare o le Tala Lelei

mai le itulau muamua

O le fesili, o ai le uluai misionare o le Tala Lelei? O ai le ituaiga tagata na filifilia e Iesu e fai ma ulua'i misionare o le Tala Lelei? O se tagata na a'oa'oina lelei? Poo se tasi sa lelei se la mafutaga ma Iesu? Poo se soo sa mulimuli ma le faamaoni ia Iesu? Poo se tasi sa malamalama lelei i tusitusiga pa'ia ma osiga taulaga? Leai!

'A 'e fia sailia le tagata lea, aua e te su'ea i igoa o le 'au aposetolo, aua e maumau ai lou taimi, aua e te le maua ai. Ae faapefea soo e to'a fitusefulu ma le lua na auina atu e Iesu? Leai. Ae a se isi o latou na tusia tusi a le 'au aposetolo? Leai foi. A o le'i taitai ona tusia e Paulo ana tusi, a ua leva ona laugaina le Tala Lelei e le tagata lenei.

O fea na sa'ili iai e Iesu lana ulua'i misionare? Na saili i tagata lolotu? Poo tagata popoto na lelei lo latou a'oa'oina i mataupuu silisili tau i le Atua? E leai. Pe na saili i aiga iloga o Iutaia leaga o le Tala Lelei o le Faaolataga le mea lea o le a fai e mana'omia ai ni tagata e popoto i le mataupu silisili? E leai!

E le taumate e te le talitonu pe a ou fai atu - na sa'ili i fanuaoti! E mata'utia le mea e su'e iai tagata faigaluega a le Alii le Faaola. E su'e i le fanuamaliu.

O ai le uluai misionare na ia maua mai i le fanua e tanu ai tagata oti? E te le talitonu foi pe a ta'u atu - o le vale! O le tagata e leaga le ulu. O le tagata e le atoatoa le mafaufau. O le uluai misionare na auina atu e Iesu o le vale na mulimuli ane avea ma ulua'i misionare o le Tala Lelei. E maua lona tala'aga i le tusi a Mareko mataupu e lima. O le ituaiga tagata lea e apoapoa'i atu lou tina ia te oe e te 'alo 'ese ai, ne'i fasioti oe. O le ituaiga tagata lea e fealua'i i le aai ma faafefe i tagata ma fasioti tagata.

A o le tagata lea na avea ma uluai misionare o le Tala Lelei o le Faaolataga a le Atua, na auina mai ai lona Alo pele e toatasi, e na te osia le taulaga mo a tatou agasala. O le Vale!

Na le iloa e le nuu o Palesitina pe o le a le mea a fai iai. E ui ina saisai ona vae ma lima i filifili u'amea, ae nofo ma tamotu. E nofo foi ma tasaei ona ofu, ma tasele lona tino i maa maamaa'i. E leai ma se tagata na mana'o iai.

Vagana Iesu! Vagana Iesu!

I nei aso ma vailaau ua tatou maua, e ono umi lava ni aso poo ni tausaga e tau togafitia ai le ituaiga ma'i lea, le tagata e le atoatoa le mafaufau.

Peitai, na o ni nai sekone na togafitia

ai e Iesu ae malosi.

E mata'utia le feiloa'iga a Iesu ma le tagata. O le vaa o le 'au soo na tuta atu e latalata i se fanuaoti e iai ma se lafu puua, o ni mea e le mama i tu ma aganuu a tagata Iutaia. E oso mai Iesu mai le vaa, ae vevesi mai le vale lenei mai se ana i le fanua maliu. E ve'uve'ua le laulu ma tafetotoi ona lima. Toetoe lava a leai se lavalava. O loo 'e'e ma tasi'i solo ona lima. Ua faaletonu le 'ausoo ma tau toe feosoi i le vaa. Ua fefefe.

Ae le'i fefe Iesu. E to'a lelei lava le Alii. (Faitau le tusi o Mareko 5). O le a tatou maua i le mataupu lea le fetai'iga lilo a le alii ma temoni, na oo ina aliali i mea na tutupu. (f.8: Aua na fetalai atu o ia ia te ia, "Alu ia i fafo i le tagata, o oe na, le agaga leaga." Fai mai le fuaiupu e 7: Ua alaga mai foi o ia ma le leotele, ua faapea mai, "Se a lau na ia te au nei, Iesu e, le Alo o le Atua Silisiliese?" Ua ta'utino e le tagata o Iesu o le Alo o le Silisiliese.

Na finagalo Iesu e toe fo'i mai le tagata i le lelei. E le'i iai se malosi o temoni e toe taofia ai. Aua na latou faalogo muamua i le leo lea. A fetalai mai le Atua, e leai sa latou mea e mafai ona fai. Ua latou aioi mai foi ia te ia, ina ia na le aueseina i latou i lea nuu. O le tula'i atu o Iesu na fefefe ai temoni. E ui lava na latou pulea le tamalaoa i ni aso se tele, a o lea ua *faaauau itulau e sosoo ai*

O le 'Api Tusitusi a le Fafine na Alofagia e Iesu

mai le tusi:

THE DAY I MET JESUS

(O le Aso Na Ou Feiloai ai ia Iesu)

mai le itulau e 7

tagata matitiva."

Na 'au atu isi soo i le manatu o Iuta. Ae ua tuu atu le aao o Iesu i luga o lo'u lima ma fetalai, "Tuu pea le mea ua ia faia. Ua ia faia lenei mea e fai ma faata'imuaga o lo'u tanuga."

Pei e faate'ia le 'au soo. "Tou te faatasi pea ma e matitiva, ae tou te le faatasi pea ma a'u." Ua fememea'i le au soo. O le uu manogi o sasala i le potu ma aumai le fiafia, ua fai nei ma faata'imuaga

o le oti.

Na silasila sa'o mai ia a'u Iesu, taletale tasi, ona fetalai lea, "Se a le mea ua outou faalavelave ai i le fafine? Aua o le mea lelei ua na faia ia te a'u nei. Aua tou te nonofo pea ma e matitiva, a o a'u nei, tatou te le nonofo pea ma a'u. Aua ua liligi e ia lenei suauu manogi i lo'u tino e fai ma faata'imuaga o lo'u tanuga. E moni e moni ou te fai atu ia te outou, o nuu uma i le lalolagi e tala'iina atu iai lenei tala

lelei, e ta'ua ai le mea lelei ua faia e lenei fafine, e faamanatu a'i ia te ia."

Na lulu lo'u ulu a o oo ifo upu o lana saunoaga i o'u tino. Ia te a'u lava ia, e sili atu le mea ua ia folafolaina mo a'u, i lo le uu nato tautele na ou liligi i lona ao, ma mili ai ona 'a'ao. Ma ou talosia, i ona taimi faigata o loo oli mai, ia na manatua lo matou alofa mo ia na liligi ai le uu manogi tautele, e matou te alolofa ai ia te ia.

mai le tusi: The Day I Met Jesus

-
tusia e Frank Viola ma Mary Demuth,
faamatalaina e
Afemata T. Apelu Aiavao

E te le talitonu i le ituaiga tagata na aveva ma uluai misionare o le Tala Lelei

mai le itulau e 8

matata'u i luma o le Atua, ma 'ai'oi ina ia alofagia i latou. Na manatu foi temoni e saogalemu i latou pe a o atu i le lafu puaa, i lo le faafeagai ma le Atua. Na talia e Iesu le latou talosaga, ma auina ai i latou i le lafu puaa e lua afe lea na tulioso i le vai ma malelema ai.

Ae leai ma se mea a le 'ausoo na faia, na o le faataupupula, a o faia le galuega e Iesu.

O tatou foi a tatou oo i se tulaga faapea i lo tatou olaga, tatou faia le mea na faia e le 'ausoo - o le 'aue le faalavelave i le taimi e faia ai e le Atua le galuega e le mafai ona tatou faia. E finagalo le Atua e tatou te vaavaai atu ia te ia, ae le o le popole i se faafitauli e pei o se matagi, poo le tamaloa ua uluitinoina e temoni.

O le a le mea na fai e i latou e ona lafu puaa? (f.14): "Ona sosola lea o e sa fagaina puaa, ma tala atu ai i le aai ma ona faoa'a' ai, ona latou o mai lea e matamata i le mea ua faia." Ua o mai tagata e matamata i galuega mamana ua faia.

(f18) - Ua malii a'e o ia i le vaa, ona aoi mai lea ia te ia o le na uluitinoina ina ia la faatasi ma ia. O lona uiga, ua lelei le ulu o le vale. Ma ua talitonu ia Iesu.

A o Iesu ua le mafai, a ua fetalai atu ia te ia, "Alu atu ia oe i lou fale, i lou aiga, ma ia e ta'u atu ia te i latou mea tetele ua faia e le Alii ia te oe, ma lona alofa ia te oe." Ua alu foi o ia, ma na tala'i i Tekapoli o mea tetele ua faia e Iesu ia te ia, ona ofo ai lea o tagata uma.

O le fe'au faamisionare lea, ua filifilia ai e Iesu le vale sa nofo i le fanuaoti, na te faia, ina ua uma ona faamaloloina o ia e Iesu, ma te'a ai lona valea, a ua fia mafuta ia Iesu.

E le'i mana'omia e Iesu se CV o le tagata lea, poo se tusi mai se mea sa faigaluega ai e pei ona masani ai, aua o lea ua silafia e Iesu, o le tagata e nofo i le ana i le mea o iai fanuaoti. O le tagata foi e valea. E tasaei ona lavalava; e tauvalaau solo; e nofo ma tamotusi filifili uamea sa loka ai ona vae ma lima. E fefefe ai tagata. Ona pau lea o mea o sona CV pe a fai.

A o lea ua filifilia e Iesu e fai ma

misionare o le Tala Lelei. Se Tala Lelei ina a uiga ese ma le tuu i le tagata valea na te amata tala'iina! PAUSE!

Ua faafia ona filifilia e le Atua tagata le taualoa e fai ma ala mai o le Faaolataga mo tagata uma? Le Au Soo e to'a sefulu ma le lua, na o le fai faiva le mea latou te iloa, ma le fonofonoina o masae o o latou upega fagota. E le'i o i ni kolisi e pei o Malua ma Piula e su'e ai ni o latou MA ma ni Ph.D. A o lea ua filifilia e Iesu e latou te tala'iina atu le Tala Lelei o le Faaolataga. Raava le fafine talitane ma le fu'a mumu na ia sisi i le faamalama i le fale i Ieriko ina ia sao tagata Isaraelu. O ia o se tasi o le gafa o le Alii le Faaola. Ruta le teine Moapi, o le nuu faapaupau a ua taamilo mai ai le gafa o le Alii Faaola. Eseta le teine Isaraelu na aveva ma masiofo a le tupu o Peresia, ma ia faasaoina ai le nuu o Isaraelu. Patisepa le fafine mulilua a ua ui mai ai le gafa o le faaolataga, ma le alofa tunoa o le Atua. Le fafine Samaria na tatia'i ana fagu utuvai i le vaieli ae tamo'e e ta'u atu i le nuu le Alii ua ia faaali atu ia te ia ana mealilo, ma fesili, pe le o le Mesia ea lea? Ma le 'au Maria, e iai Maria le tina o Iesu, ma Maria le fafine talitane na ia uu le Alii i le uu nato tautele, ma solo vae o le Alii i lona lauulu, o se mea e le tatau ona faia e se teine amio lelei i lona lauulu.

Faitioina John Key le sa fai ma palemia o Niu Sila, i lona loteina o le lauulu, poo le fili a le teine i se fale'aiga na asiasi iai. Ona o le lauulu o le teine, o se vaega o lona mamalu. E le soona loteina e se isi vagana lona tina, ma lana tane, ma ona tei. A o lea ua loteina e le palemia o Niu Sila. A o le mea lea ua faaaogaina e Maria e mulumulu ai 'a'ao o le Alii lea ua fetafea'i ai le uu sausu taugata. Ma fetalai ai le Alii, soo se mea e oo atu iai le Tala Lelei, e oo atu foi iai le manogi o le mea na fai e Maria le fafine talitane ua faamagaloina e le Alii Faaola. O le taulaga o le faamamaina o agasala a le lalolagi, a ua aumai iai fafine leaga, talitane, e fau ai le togafiti. Tafefe! O le fofo alamea lea a le lagi. O le fofo alamea lea a le lagi.

Le aiga o le Atua i lenei taeao, aua e te manatu mama i lou tagata ma mea e mafai ona e faia mo le Atua. Poo le a lava le taleni oi ia te oe, pe leai foi se taleni, e iai lava le vaega e faaavanoaina mai e le Atua, e te faia mo ia. E silafia lelei e le Atua lou tagata, ma le mea e te aoga iai mo ia, pe a e tuuina atu lou tagata, e te tautua ma e auauna atu ia te ia. O Iesu lava ia na fetalai: Ua ou sau ina ia outou maua le ola, ia maua atili ai lava.

Aua tatou te manatu mama i nai mea iti, poo nai taleni, o loo ia i tatou. Aua o nai nutinamea na e faalapopo'a e le Atua, ma na faaaogaina mo lana Tala Lelei o le Faaolataga mo tagata uma. Amene.

O Malaga o le Faatuatua i "IERUSALEMA FOU"

mai le itulau muamua

mea o iai Ierusalem Fou. Le nuu ma le malumalu na fausia e o latou tua'a ina ua faoa e tagata Moselemu le mea sa iai le malumalu tuai i le tausaga e 1187. O taua ia sa ta'ua o "Crusades" a tagata Kerisiano faasaga i tagata lotu Moameta ia na manana'o e faoa le tele o eleele o le Nuu Paia, poo eleele sa i lalo o le Nuu o Isaraelu, e fai mo latou a o loo taapeape pea tagata Iutaia i tafeaga i nuu ese i lea vai taimi.

O le mea ua latou fau ai le latou Ierusalem Fou, o Lalibela i le itu i matu o Aitiope, o le aai e tusa o le

20,000 ona tagata. Peitai o lea fuainumera e faateleina ma oo atu i le silia ma le 100,000 tagata i le amataga o le masina o Ianuari, pe a lolofi atu iai le 'au faatuatua mo le faailogaina o Genna (poo Ledet), le Kerisimasi e tusa o le kalena o talitonuga o le faatuatuga o Kerisiano Aitiope.

O lo latou talitonuga, ia iai lava se avanoa se tasi e malaga ai le Kerisiano Aitiope i Ierusalem Fou i Lalibela i lona olaga, tai pei ai lo latou talitonuga ma le talitonuga o tagata Isalama e malaga i Medina.

faaauau itulau e 12

O Molimau i le Mana Faaola ma le Mana Fofoa o le Atua

tusia e: Afemata Tunumafono Apelu Aiavao

O Senoa Iose (Senhor Jose), o se faifaato'aga i le atunuu o Parasila (Brazil) i Amerika i Saute. E le tele lana faato'aga, na o le lua eka. E tausii lava e Senoa Iose le lua eka lenei ma lona talitonuga o sana mea totino lea o le lalolagi o loo ola ai. Ua ia iloa uma manu felelei e fai ma a latou masani le talatalafulu ma fai o latou ofaga i nai laau o iai i le fanua. Ua ia iloa foi vaega o lona fanua e tele ai anufe eleele (earthworms) ma vaega e le tele ai. Ua 37 tausaga o nofo ai Senoa Iose i le fanua lenei, ma ia suotosinaina, auau maa, faalelei eleele, ma selesele fua o lona fanua e ola ai lona aiga i le faa'oga ia latou mea'ai, faatau atu foi nisi i le maketi.

Na asiasi atu iai se alii misionare i se isi aso ma la talatalanoa. Fai mai o ia i le misionare, "O le lua eka lenei, e matua lava lelei e totona ai mea'ai e tausii ai lo'u aiga e to'a 14." O le tala lea a Senor Iose, ma fesili atu i le misionare, "O fea foi na e fai mai e te sau ai?"

"O Amerika."

"A o le a lau mea lea e fai iinei?"

Na faamatalatala atu iai e le misionare lana galuega. E le'i tali ane, a ua savali atu aga'i i le vai o tafe i le alia, ua nofo i luga o se papa, ma amata tatala ona lavalava. Na fesili atu iai le misionare, "O le 'a 'e ta'ele?"

"Ioe. O le Aso Toonai lenei."

Ua uma ona ta'ele Senoa, ona savavali atu lea aga'i i le fale ma le misionare. Na ui atu i se

togatolo 'aina, na tago ai Senoa ua sala mai le tolo ua fisi, ma tuu atu i le misionare. Na oo atu i le fale ona nofonofo lea i nofoa o i tafatafa o se laulau o iai. E umi se taimi e leai se isi e tautala a ua na o le gau o le tolo a le tagata ia. Ona fesili lea o Senoa Iose, "Oi, o oe la o le misionare, a? Ai se faigofie o lau galuega, a ea?"

Tali le misionare, "Aisea ua e fai mai ai e faigofie?"

Ae tali Senoa Iose, "E le faigata ia te au ona ou talitonu i le Atua, pe a ou mafaufau atu i le tele o mea ua faia e le Atua mo a'u e ala mai i la'u lua eka lea, i lea tausaga ma lea tausaga ma lea tausaga. E le mafai ona le fua mai i fua matua lelei a'u mea toto e 'a'ai ai lo'u aiga, faatau isi fua o le faato'aga e maua mai ai tupe. Faapefea la ona ou le talitonu i le Atua? O le mea lena ou te manatu ai e le faigata lau galuega pe a e taumafai e liliu tagata e pei o a'u i le Alii" Na valaau Senoa i lona toalua e toe asu mai le mea'ai.

Ina ua fo'i le misionare i lona aiga, na ia mafaufau ai a o nofo i lana taavale. Matua manaia le olaga o Senoa, i le fanua o nofo ai, e leai se vevesi o le tele o taavale, leai se vevesi i le siakiina o pepa e malaga ai i le vaalele. Leai se fe'oma'i i supamaketi i le faiga o faatau. E le taumate na te le iloa le mafuaaga o Evagelia e fa oi le Tusi Paia, poo ni tala ia Matini Luteru ma le oti faa-maturo o

ulua'i ta'ita'i o le Ekalesia Kerisiano.

Ona mafaufau ai lea o le misionare i le faatuatua o Senoa Iose e foliga e faatauva'a ae matua tele lava. I lona mafai ona talitonu, ma lona ofo i le faigata ona talitonu isi tagata i le Atua, ae o loo tuu mai le siosiomaga o le laueleele ma le sami ma le vanimonimo e molimau i le mana faaola ma le mana fofoa o le Atua. Na tau faatusatusa e le misionare le faatuatua lea i le faigata ona talitonu o isi tagata: le tama a'oga i le Iunivesite; o le inisinia; o le fai pisinisi mau'oloa. Ona e tau saili e latou ni faamaoniga o le Atua, a o Senoa Iose, e laiti lava mea e faavae ai lona faatuatua, ae ogaoga. O lona faatuatua o loo faavaeina i vavega o faaali mai i mea o loo i le loloto o le siosiomaga, i aso uma:

O le tama'i fatu e toto ae oo ina tupu maualuga ma avea ma laau tele. O le fasilaau e sunu'i i le eleele ae ola lauusi ma maua mai ai le 'i'o. O le nuanua e lolo'u ona foliga ma ona lanu felanulanua'i.

O mea ia e ofo ai Senoa Iose, ma totogo a'e ai lona faatuatua. O Senoa o se tagata ua ia molimauina le matalasi o le faaaliga o le fofoaga a le Atua - le oso mai o le la; le mauitu o le pogisa ae sosolo mai le malamalama; le tai fana'e ma le tai pe atu; le tausani o manulele ma latou susu'ea le 'ie'afu o le po ae se'i ala mai le la ma lona malamalama; le toto'e a le toa na te alagaina le tafaoata.

O mea ia e le faigata ai ia Senoa Iose ona talitonu i le tuugamau tuufua ma le toetu
faaauau itulau e 11

“Ou te le faia foi ona o se miliona tala”

I se isi aso a o galue le taupousa ta'uta'ua o Mother Teresa i le fufuluina o le mea sa iai le isu o se tamaloa. Initia ua papala uma le tino i le ma'i lepela, na talosaga atu ai se turisi Amerika pe na te mafai ona pu'e se ata o lana galuega lea o fai i le tamaloa. Ina ua tuu

atu e Mother Teresa le faatagaga i le turisi, na matauina e le turisi le fai ma le faaeteete ma le alofa e Mother Teresa o le fufuluga o le mea sa iai le isu o le tamaloa, ua papala, tafetotoi, manogi leaga, ona fai atu ai lea ia Mother Teresa ma lona ofo, “Mother Teresa, ou te le mafai

ona ou faia le mea lena e te faia tusa lava pe totagi mai ia a'u e se tagata se miliona tala ina ia ou faia ai.”

“Ou te le faia foi, ou te le faia ona o se miliona tala!” O le tali lea a Mother Teresa, le taupoua na ia maua le Faailoga Tauloa maualuga o le Nobel Peace Prize ona o lana galuega mo tagata mama'i, matitiva ma le tuulafoa'iina o Initia.

O le Tamā mo e Leai ni Tamā

E valu tausaga o Emi. E pa'e'e lona tino, ve'uve'ua lona laulu 'ena'ena ae palapala mata. Ae ui lava i ia foliga, e ese le manaia o lana 'ata'ata, ma ona mata lanumoana lapopo'a fiafia.

O Emi o se tasi lea o teineitiiti e to'a fitu na tofi mai i le vaega ou te fesoasoani iai. O le nofoaga leni e iai tamaiti nei o se nofoaga a le Ekalesia Kerisiano mo tamaiti e le lelei lo latou vaaiga ona o tulaga o loo iai o latou aiga. O le toatele foi o latou, latou te le iloa poo ai o latou matua.

Ina ua faato'a taunuu mai teine i le nofoaga leni (camp), na auaua'i i luga e ta'u mai se faamatalaga e uiga ia ia lava poo lona aiga. Ina ua oo atu le faasologa ia Emi, na nofo sa'o a'e i luga Emi, ma faamatala mai i lona leo e tau le lagona, fai mai o lona tina na fasioti e se isi.

Mulimuli ane, ina ua ou maua se avanoa ou te talanoa ai ia Emi e uiga i le mea lea na ia ta'u e uiga i lona tina na fasioti e se isi, na ia faaali mai ai ia te a'u, o lona tina sa ola i fualaau faasaina (drugs), ma e na fasiotia e le tamaloa sa fai ma ana uo. Ona pau lea o le mea na ta'u ane e Emi. Ona ou fesili lea iai pe iai sona tama, ae tali mai na te le iloa poo ai sona tama. Na toe nofonofu Emi ua le pisa, ona fai mai ai lea, “Oi, e iai lo'u tama i

le lagi.”

Na ou faaletonu pe o le fea e sili ona leaga, o le le iloa poo ai lona tama, poo le iai lea o sona tama a ua oti. Na ou fesili iai, “Oi, sa iai sou tama a ua oti.”

Na vaai ita mai ia a'u ma tali mai, “Leai! O le Atua! O lo'u Tama le Atua!~” (God is my Father!)

Na ou 'ata'ata lili, aua o a'u e tatau ona ou iloa ia mea. O a'u lea e a'oa'oina. A o lea ua fai la'u fesili faavalevlea faapea.

tusia e Teresa Vining

O Molimau i le Mana Faaola ma le Mana Foafoa o le Atua

mai le itulau e 10

mai o le Alii le Faaola, o Iesu Keriso. Sa faigofie ai ia te ia ona malamalama ma talitonu, i le ola mai o laau o lona fanua, e felanulanua'i o latou lau; e eseese foi foliga o ia laulaau ma ia laulaau. A o fua foi ma 'i'o. E faapefea ona palu e le eleele ana lanu ma ana palapala ina ia 'i'o ai, ma fua mai, ma fetiitii mai laulaau felanulanua'i. Ma le niu e 'umi i luga; ma le mago fua fuata ma suamalie; o le polo feu ma le lau kapisii; ma le fa'i a uma ona fua ona mate lea ae oso mai ona tatupu.

A mafaufau foi i le sami poo le vasa tele. E iai se tagata poo se pilionea na te mafai ona fai sana pisinisi e faapea ona ese? O le sami e fafagaina e vaitafe e tele ma timuga, o loo tumu ai

le miliona ma miliona o i'a ma isi meaola e tele o le sami? E mafai e se fai pisinisi ona fau se sami, fau ma ni ao e toto mai ai timuga ma maua ai vaitafe e tafe atu ma maua ai le sami, maua ai ma lona 'o'ona? O mea na sa faigata ai ia Senoa ona le talitonu i le Atua, o le ala lena o lona fai ane, ai se faigofie o le galuega a le faifeau misionare.

Fai mai se isi tagata, “O le natura poo le siosiomaga, o le fai evagelia aupito malosii lea mo le Atua.”

O le mana faaola ma le mana foafoa o le Atua e le tau sailia i ni tusi. Tatala le tusi o le Siosiomaga, ma faitau ai i le mana o le Atua na fai ai mea uma, na fai ai foi le Faaolaga ma le Tuugamau Tuufua.

O Malaga o le Faatuatua i "IERUSALEMA FOU"

mai le itulau e 9

O lo latou talitonuga, o lo latou toe asaina lea o le ala mai le pouliuli ma aga atu i le malamalama, o tausaga e 800 o lo latou talafaasolopito, ma ulufale atu i le Ierusalem Fou ua latou fausia i se elele mautu, ma ua avea nei ma nofoaga e tausaga ma

amana'ia i lalo o puipuiga a le lala o Malo Aufaatasi, o le UNESCO World Heritage Site. A o le sini autu lava o lo latou malaga i Ierusalem Fou, o lo latou Atua, le Atua o Kerisiano Aitiope.

O le senituri e sefululua na faatonuina ai e le Tupu o Lalibela o Aitiope, o se Kerisiano, le fausia

o se Ierusalem Fou i Aitiope e suia ai le Ierusalem sa iai i le Nu'u Pa'ia, lea na faoa e tagata lotu Isalama i le tausaga e 1187. Ona fausia ai lea o ni malumalu se sefulu tasi, e sosoo faatasi. O ia malumalu e mata'utia lo latou fauga, ona e le'i fasia i ni laupapa poo ni sima poo ni piliki, ae na vaneina i le mauga papa 'i'ila e aunoa ma ni masini na faaaogaina.

O le malumalu aupito lauiloa o ia malumalu o le malumalu lea o Sagato Siaosi, (St. George), na fausia i foliga o le Koluse o le Lotu Eleni. E 23 tausaga na vaneina ai ia malumalu, ma maua ai se nofoaga saogalemu, e lalafi ai Kerisiano ma tatalo, ma saogalemu ai mai ni osofa'iga a tagata Moselemu oi le itu i matu.

E matua matitiva lava tagata, ma aga maulalo. O o latou moomooga lava, ia oo mai le oti a ua uma ona fai o se malaga i Ierusalem Fou i Lalibela. A o le masani lava a nei Kerisiano Aitiope, e savavali lava i ni maila e fia selau faato'a taunuu i Ierusalem Fou. Savavali le toatele e leai ni seevae, leai ma ni mea e tua iai, ae faamoemoe i le fesoasoani ane o tagata i nuu e latou te uia.

A taunuu atu i Ierusalem Fou i Lalibela, ona pepese lea ma sisiva fiafia, faitau a latou Tusi Paia ma tusi tatalo. E felagolagoa'i i latou a o fai le latou malaga umi mai itu eseese o lo latou atunuu. O fiafia o le latou Kerisimasi (Genna), e amata i le itula e lima i le vaveao, e gasolo atu ai i malumalu soofaatasi i Ierusalem Fou, ma ui atu i ana ua soo faatasi i lalo o le manava o le elele e sosoo ai malumalu uma. E sili atu i le 40 futu le maualalo o nei ana, ae oo atu i le 300 mita le uumi o nisi.

I aso nei, o loo malosi pea le Ekalesia Kerisiano i Aitiope, peitai o se tasi lenei o atunuu o loo malosi ai foi faiga faatupu faalavelave a nisi o tagata lotu Isalama.

Suafa o A'oa'o ua Talia i le Ta'utinoga mo le Ulufale i Malua faatasi ai ma faletua mo le 2017

Suafa

Matagaluega

- | | |
|---|------------------|
| 1. Anesone Anesone | Faleata |
| 2. Asoiva Saofai | Niu Sila i Saute |
| 3. David Mafua ma Leah | Vitoria |
| 4. Eletise Palemene | Vitoria |
| 5. Emani Tevaga ma Naitosara | Manukau |
| 6. Falepau Tuiluga ma Karoline | Kuiniselani |
| 7. Fenika Faalave ma Amelia | Manukau |
| 8. Fetu Fetu ma Sina Ilaisa Fetu | Vitoria |
| 9. Ketty Iupeli ma Vetta | Faasaleleaga |
| 10. Luulau Taulagi ma Faauiga | Faasaleleaga |
| 11. Mauola Taito ma Rona | Aukilani |
| 12. Meafou Ah Ching | Faleata |
| 13. Mealila Faasalafa | Faasaleleaga |
| 14. Nuufaigata Mulipola ma Laalaai | Faasaleleaga |
| 15. Paulo Sepuloni | Apia i Sasa'e |
| 16. Peniamina To'ailoa | Niusauuelese |
| 17. Filifili Potoa'e Malifa | Faleata |
| 18. Salevao Leona ma Faaeafaleupolu | Manukau |
| 19. Samuelu Afutiti | Apia |
| 20. Sinapati Sone ma Aomalu | Apia i Sasa'e |
| 21. Tafatolu Sisigafu'a Bentley ma Amelia | Kuiniselani |
| 22. Talolua Lobendam Saia | Vitoria |
| 23. Tiafau Vaega | Niusauuelese |

E to'a 11 a'oa'o e le'i faaipoipo, ae to'a 12 a'oa'o ua faaipoipo. E iai a'oa'o ma faletua e lelei le latou faa-Samoa, ma ua fautuaina ina ia taumafai e a'oa'o le latou faa-Samoa.

O le Tāua o le Igoa Iesu

(Pepa mo le Mafutaga Matagaluega Apia - 2 Iulai 2016)

Su'esu'ega i le Tusi Paia: Feagaiga Fou Saunia e Rev. Tuana'i Uesile

Faatomuaga:

Ou te taofi ua nofo fale i aai o finagalo, ma ua matua manino ma lautele foi le silafia o le pa'ia o lenei mafutaga, i le uiga loloto ma le mafuaaga aemaise foi o le taua o igoa, poo suafa ua faaigoaina ai soo se tagata, e pei ona fai ma fe'au autu o lenei vaiaso.

O le ala lea o se taofi, o le a le toe asa mamaoina se lagona, aua ua manino le mata o le vai i ona vaega uma, e pei ona saunoa iai tootoo ua mavae atu. Ae o le a aga'i sa'o loa se mafauaaga, i le Autu ua ta'oto e pei ona poloaina ai le auauna e faatinoa lenei su'esu'ega: **O le Taua o le Igoa o Iesu.**

E maua luga le manatu o se Autu ua sili ona faigofie mo lenei mafutaga, aua e le se suafa o toe faanefu iai le silafia, pe toe tau faailoaina mo tatou o Kerisiano, o e ua talitonu ma faatuatua ia te ia. Afai o Iesu Keriso o le fatu lea o le talitonuga faa-Kerisiano, e amata a'oa'oina mai ai lava le tamaitiiti i le Vasega Faitau Pi, O ai lou Faaola.....? O Iesu, faasolo atu ai i lona talavou se'ia oo ina avea ma tagata matua, o faalogo pea i le lautele ma le loloto o le a'oa'oina o le Iesu lea, o le mea mautinoa lava la ua mafa totoga, manino ma malamalama lelei tatou uma iai.

O le faamoemoe la o lenei suesuega, e le o se taumafaiga e toe tau faamatala ma faamalalama se a'oa'oga fou e uiga i le taua o le suafa o Iesu, a ua na o ni nai motuga'afa, e toe faamanatu ma faaopopo atili, i le loloto ma le lautele o le silafia faale-faatuatua o lenei mafutaga, e uiga ia Iesu. Atonu o le a fesoasoani le vaevaega ua taumafai iai, e faafaigofie ai se vaivaiga.

1. Mafuaaga o le Igoa Iesu

E pei ona silafia, o le igoa Iesu e le se igoa na afua pe na fuafua e Iosefa ma Maria, e faaigoaina ai le pepe na

folafola o le a fanau mai ia i la'ua, e pei o le aga masani a matua Samoa.

O le molimau a le fai Evagelia o Mataio, o loo faailoa manino ai, o le Igoa Iesu, o le igoa na ta'u atu e le agelu a le Alii ia Iosefa (Mataio 1:21) 'Ua faaali mai ia te ia le agelu a le Alii i le miti, ua faapea mai, 'Iosefa e, le atalii o Tavita, aua e te fefe ina aumaia ia te oe o Maria lau ava; aua o lana to e mai le Agaga Paia lea. E fanau mai e ia le tama tane, e te faaigoa foi ia te ia o Iesu, (o le Faaola), aua e faaola e ia lona nuu ai a latou agasala.'

A o le molimau a Luka o loo faamauina ai, o le igoa Iesu, o le igoa na faailoa e Kaperielu le agelu a le Alii ia Maria, ina ia faaigoa ai lana pepe o le a fanau mai.

Luka 1: 31) "...Faauta foi, o le a to oe, ma e fanauina se tama tane, e te faaigoa foi ia te ia o Iesu. O molimau mautinoa ia ua manino ai, o le igoa Iesu o le igoa mai le Atua.

1. O le Uiga o le Igoa Iesu

Ua mafai ona faamatalaina le uiga o le igoa Iesu, i tusitusiga a nisi o le au popoto o le Tusi Paia e faapea, o le igoa Iesu (Jesus) poo le *iesus* i le Gagana Eleni, o le faaliliuina lea o le igoa Iosua (Joshua) i le Gagana Eperu. O le uiga o le igoa Iosua, e uiga tutusa ai ma le igoa Iesu, o *Ieova poo le Atua o le Faaolataga*, poo le faapea foi, *O le Atua, na te faaola poo le a ia faaola i ona tagata* (Yahweh is salvation or Yahweh will save His people). O le uiga taua ma o le feau autu foi lea o le igoa Iesu. O le Atua na te saunia le faaolataga, poo le Atua na te faaola, ma lavea'i lona nuu ia latou agasala.

2. O isi igoa ua faamatalaina ai le igoa 'Iesu'. O nisi faalagiga ma faalupega ua mafai ona faamatalaina ai faa-mataupu silisili, le tulaga pa'ia ma le mamalu o lo tatou Alii o Iesu, aemaise o le faamoemoe o lona afio mai i le lalolagi, e pei foi ona ua tatou

laulau vivilu ma malamalama lelei ai, e aofia ai igoa nei:

(i) O le Keriso (*Christ*)

O le igoa Keriso, poo le '*Christos*' i le gagana Eleni, o le faaliliuina lea o le igoa Mesia i le gagana Eperu, o lona uiga, *O le ua faauuina* (the anointed one).

O nisi o tusitusiga, e le gata o le 'au fai evagelia, a o i latou e pei foi o le aposetolo o Paulo, ua tele lava ina faaoga faatasi le igoa Iesu ma le igoa Keriso. (Mataio 8:29). '*Ona tali mai lea o Peteru ia te ia, "O oe o le Keriso"*. (Roma 5:1) "*O lenei ua ta'uamionuina i latou i le faatuatua, o lea ua latou lelei ai ma le Atua, ona o lo tatou Alii o Iesu Keriso.*" O lo tatou talitonuga, o se faalupega poo se faalagiga lea ua sili ona taua, e faailoa ai lo latou faaaloalo tele i le tulaga pa'ia o Iesu, ma saga faamatalaina ai le taua o lona igoa, ma ua foliga ai lava o se igoa e tasi, ae manino lava lona eseeseaga.

Afai e toe faaupuina le igoa Iesu Keriso, fua i uiga o ia igoa e lua e pei ona faamatalaina i luga, ona faapea lea, o Iesu Keriso, '**O Le ua faauuina e fai ma lavea'i ma faaola mo ona tagata, ina ia maua le faaolataga a le Atua.**'

(ii) O Emanuel (*Immanuel*)

O Emanuelu o le igoa lea o le Mesia na valo'ia e le perofeta o Isaia ia Aasa le tupu o Iuta, o le a fanau mai e fai ma faailoga o le iai faatasi o le Atua ma i latou, (Isaia 7:14) "*.....Faauta, e to le taupou, ma fanau mai se tama tane, na te faaigoa foi ia te ia o Emanuel.*" O le uiga o le igoa Emanuelu, *Ua ia te i tatou le Atua*. O le tusi la a Mataio 1:23 o loo faaogaina ai e le tusitala o Mataio upu sii nei mai le tusi a Isaia, e faamatalaina ai le faataunuina o le Afioga a le Atua e pei ona folafola e le perofeta o Isaia, *faaauau itulau e 14*

O le Taua o le Igoa Iesu

(Pepa mo le Mafutaga Matagaluega Apia - 2 Iulai 2016)

Su'esu'ega i le Tusi Paia: Feagaiga Fou

mai le itulau e 13

e ala i le fanau mai o Iesu, o le Emanuelu lea sa valo'ia, o le faailoga manino o le Atua ua 'au faatasi ma tagata.

(i) O le Atalii o le Tagata (Son of man)

O le igoa ua faamatalaina ai le tulaga o Iesu i lona avea ma tagata. I le tusi a le perofeta o Tanielu 7:13, "*Na ou iloa i faaaliga i le po, faauta foi, ua afio mai i ao o le lagi Le e pei o le Atalii o le tagata...*" Ua tatou masani i tusitusiga e iai le gagana a le tusi lenei o Tanielu, e pei foi o le fuaiupu lea e 13, o loo tautala i faaaliga o mea o le a tutupu i le lumana'i. Ua manino ai le tulaga ese o le Atalii o le tagata, le Mesia o le a maliu mai. E aoao lona malo e oo i le aso faamasino.

I le tusi a le Evagelia o Ioane 1:14, o loo faailoa manino mai ai foi le liu tino tagata o le upu foafoa a le Atua, o le mamalu lava lea o le Alo e toatasi o le Tama, o Iesu lea. O ia mea uma faatasi ma le tele o vaega o le soifuaga o Iesu mai lava i lona fanau mai i le fale o manu, se'ia oo ina taualuga lana galuega faola i lona maliu ma lona toetu manumalo e pei ona lau silafia, ua tatou saga mautinoa ai lava, le atoatoa o le tulaga o Iesu i lona avea ma Atalii o le tagata.

(ii) O le Alo o Tavita (Son of David)

O se tasi lea o igoa ua faaigoaina ai Iesu, i molimau a le 'au fai evagelia. E le gata o le faamaoniga atili ai o lona tulaga i le avea ma tagata, a o lona faasinomaga ma lona tupu'aga i le gafa o le tupu o Tavita, e pei ona faamauina i le tusi a Mataio mataupu 1. E manatu ua faigofie ma o le a le tele foi iai se faamatalaga i le gafa lea o Iesu, aua sa saunoa manino foi iai le tootoo o le ulua'i pepa ananafi, ua le gata o le gafa o Iesu i le amata mai ia Tavita, a o tua atu e pei o le afuaga mai ia Aperaaamo.

(iii) O le Alo o le Atua

O le igoa lea ua faaigoaina ai Iesu i

lona tulaga pa'ia o le avea ma atalii o le Atua (divine sonship), aemaise o le faamaoniga o lona afio mai mai le Atua. O loo manino i le faaaliga a le agelu ia Maria a o le'i afuafua lona ma'ito, Luka 1:32. "E sili o ia, e ta'ua foi o le Alo o le Silisiliese." Luka 1:35. "...o le mea lea e ta'ua ai le tama pa'ia e fanau mai, o le Alo o le Atua."

O le papatisoina foi o Iesu e Ioane, o loo molimau uma ai fai evagelia o Mataio 3:16-17, Mareko 1:10-11, Luka 3:22, na afio ifo ai le Agaga Pa'ia pei se lupe, ua oo mai foi le siufofoga mai le lagi ua faapea mai, '*O lo'u atalii pele oe, ua ou fiafia lava ia te oe.*' O loo manino foi i molimau a fai evagelia lava nei, Mataio 17:5, Mareko 9:7, Luka 9:35, i le vaaiga na faate'ia ai Peteru, Iakopo ma Ioane, o soo iloga o Iesu i luga o le mauga, na ave iai e Iesu i le ao pupula uiga ese ma le siufofoga o le Atua mai le ao, "O lo'u Atalii pele lena, ina faalogo ia outou ia te ia." O nei molimau uma faatasi ma le tele e le ma faitaulia, ua saga faamaonia atili ai le tulaga o Iesu, o ia lava o le Alo o le Atua, a ua ia le manatu o se mea e 'u'umau lona tulaga ma le Atua, a ua afio mai e avea ma tagata, ina ia faataunuaina le faaolataga a le Atua mo le lalolagi.

Aotelega

Ua ta'oto atu i lumamea se vaivaiga, e ala i se vaevaega ua taumafai ina ia faafaigofie ai ona fatu se manatu, i lenei igoa Iesu, e sili ona taua ma pele i soo se Kerisiano faatuatua. E ui ina o se autu e lautele ma loloto, ae atonu ua mafai e le faama'ite i le vaivai o le fai pepa, ona faamanatu ma faamautu i aai o finagalo, le taua ma le moni o lo tatou faatuatua ma lo tatou talitonuga i le Tala Lelei ia Iesu Keriso, e pei ona outou gasea ma lailoa e auauna ma galulue, i le tautua matavela ma le afu liligi.

Ua manino i ulua'i pepa sa fefaasoa'i ai, le mataupu i le valaauina o Aperaaamo, e amatamea i le toe faatulagaina ma le toe afuaina o

le taeao fou, i le mafutaga a le tagata ma le Atua ua malepelepe talu le ulua'i tagata, aemaise o faamanuiaga na folafola i le osiga feagaiga a le Atua ma Aperaaamo.

O auauna filifilia foi a le Atua e pei o Iakopo, Mose ma Arona, na tina, ma o latou sao taua ua ta'uta'ua ai pea o latou igoa i le tala faasolopito o le Tusi Pa'ia, se'ia oo mai i perofeta, ua manino ai lava le faamaoni o le Atua, ina ia faamautu pea le faamoemoe o lenei Feagaiga, ina ia taunuu lava ma faaatoatoaina faamanuiaga e pei ona ia folafola ia Aperaaamo.

A o le faaua'a pea o Isaraelu, ma ua siliga tali i seu ai le faamoemoe pa'ia o le Atua, lea lava ua manino ai i le igoa o Iesu le faamoemoe o le Atua na auina mai ai, ina fai ma lavea'i ma faaola, e faia le faaolataga e le gata mo Isaraelu, ae faapea foi i le lalolagi agasala e iai ma tatou.

O isi igoa foi ua fai ma faalupega o lo tatou Alii, o le faamaoniga lava lea i le lalolagi o le eleele e le malie i vai, ina ia talitonu i lana tapenaga mae'ae'a, na ia afio mai ai lava o Emanuelu e militino ma mafuta faatasi ma tagata, e ui lava o ia o le Alo o le Atua. E le mai se isi lava gafa lona tupuaga faale tagata, a o le suli tau Aperaaamo, ua faia ai e le Atua le faaolataga mo le lalolagi agasala. O le finagalo o le Atua, ina ia le fano lava se tasi o i tatou o lana fanau faatuatua, a ia maua e i tatou uma le ola e faavavau, o le faamanuiaga na ia folafola ia Aperaaamo.

*You find true joy
and happiness in
life when you give
and give and go
on giving.*
Eileen Caddy

Faauuga a le Kolisi Faafaifeau i Malua

O le Aso Toonai 27 Novema 2016 na faia ai le sauniga o le Faauuga o A'oa'o e to'a 20 ma o latou faletua, i le Kolisi Faafaife'au i Malua. Na auai i lea sauniga nisi o le afaigaluega a le Atua, aemaise faafeagaiga o aulotu e o mai ai a'oa'o ma o latou faletua, matua, aiga ma uo a i latou na faauuina.

O le sauniga sa faia i le Maota o le Mafutaga a Tina i Malua, ma e sa taitaiina e le Susuga i le Toeaina ia Rev. Elder Tavita Anesone FT, o ia foi o le Ta'ita'ifono o le Komiti a le 'Au Toeaina.

O le Faauuga o le sini lea ma le taunuuga o le fa tausaga o a'otauina faafaife'au i le Kolisi i Malua. Lea ua mae'a, ma o le a faatalitali mo le valaau mai aulotu e mana'omia ni a latou faifeau. A o nisi foi, ua valaauina.

O a'oa'o e maua foi o latou avanoa e galulue ai i nisi o galuega a le Ekalesia, e pei o le Ofisa Tutotonu i Apia, kolisi a le Ekalesia e iai Malua, Maluafou, Leulumoega, Nuuausala, Tuasivi ma Papauta, le TVEFKS, ma le Malua Printing. A o le faamoemoe autu lava o a'oa'o, ia avea ma faifeau tausi nuu.

O suafa nei o a'oa'o ma o latou faletua na faauuina, ma alalafaga e o mai ai:

1. Eroni ma Litia Sitanilei (Toamua/Savaia)
2. Faalata ma Sarai Le'aumoana (Paia/Safaato'a/Sataoa)

3. Fiamalua ma Faapisa Peleseuma (Ulutogia/Sapapalii)

4. Francisco ma Olive Fatu (Vaitoomuli/Fasitootai)

5. Kuresa ma Easter Tavalani (Saleimoa)

6. Panapa ma Tema Alafau (Lelepa)

7. Rupi ma Tamara Apaola (Saleimoa/Safune)

8. Rupi ma Kanona Leota (Salesatele/Sapunaoa/Matautu Falelatai)

9. Soliga ma

Falelau'i'ula'aepou'itoa Aleki Te'o (Afega/Tafua)

10. Sumeo ma Sauimalae Leota (Falelatai/Vaiusu)

11. Vaasaumamao

Lafa'aua (Vaovai/Uafato)

12. Fatilua ma Vaituutuu Fatilua (Leusoalii/Laulii/Lona/Moataa)

13. John ma Rotanya Kalolo (Atafu)

14. Latu ma Malua Afioga (Moataa/Vailele/A'ufaga)

15. Leefu ma Ie Pule (Lepa/Vaivasetai)

16. Melepone ma Tupe Isara (Vaitelefou/Moataa/Pu'apu'a/Avao/Vaiee/Faleasiu)

17. Timoteo ma Ilasa Tapelu (Magiagi/Siumu/Avao/Safotu)

18. Ututau ma Samaria Tauati (Vaivaseuta/Vaiala)

19. Vailele ma Eseta Lemalu (Matautu Lefaga/Safotu)

20. Letaulau ma Tina Pesaleli (EFKS Nuufou/Vaitele)

O E UA FAI I LAGI LE FOLAUGA

Tasele Petaia Iosefa Aneki Tui

17 Iulai 1949-23 Setema 2016

O le faletua o le Faifeau Toeaina ia Iosefa Aneki Tui FT, o le Komiti Faatonu o le Matagaluega a Hawaii. Na soifua mai Tasele i le aso 17 Iulai 1949 i Fasitoo Uta, ae maliu i le maota gasegase o le Queens i Honolulu i Hawaii i le aso 23 Setema 2016. O lona tama o Legalo Petaia Salanoa FT, o Tula i Amerika Samoa; a o lona tina o Tumua Toleafoa Salanoa o Fasitoo Uta.

Na faaipoipo ma Iosefa Aneki Tui i le aso 30 Oketopa 1971. E to'asefulu nai o la alo, e to'avalu teine ma tama e to'alua, ma ua luasefulu ma le lua fanau a nai o la alo.

Na galulue faatiakono mai ia Iulai 1973, na ulufale i laua i Malua ia Fepuari 1982 ma faaiuina ia Tesema 1984. Na galulue i le aulotu i Satuimalufilufi mai le tausaga e 1985-1988. Ona malaga mai lea ma galulue i le aulotu o le Vaipuna o le Ola i Hawaii mai le 1988 seia oo ina valaau mai lona Matai. Na avea ma Taitaifono a le Tautua Puapuaga o Tagata (TPT) i le 2006, aemaise o lona pale mai i le tofi taitaifono a le Mafutaga Aoa o Tina i le 2016.

O se tina e finau ma loto tele ma faamaoni i le galuega a le Alii. E tai usufono lava i tausaga uma, aua na te faaatoaina le numera o usufono a Hawaii i le Fono Tele pe a le atoa. E finagalo i mea maopoopo ma ta'uleleia. E ma'ale'ale ma aafia gofie ona lagona i ni tala a nisi; a o se tagata foi e agamalie ma fai tala tausua, ma e tumu foi i le loto alofa. Pe fesoota'i pe le fesoota'i Tasele i se tagata, e tutusa uma lava, aemaise



le aufaigaluega faifeau ma o latou faletua pe a malaga mai i Hawaii.

O le Fono Tele o le 2016 na silafia ai e le Ekalesia ma le Mafutaga Aoa o Tina le finau ma lona loto tele, ina ua mafai ona malaga atu i Samoa, e faataunuu ona tiute faata'ita'ifono, a ua tuga ma ogaoga aafiaga ona o gasegase ua faata'otolia ai. E ui ina fe'avea'i i le nofoa faataavalevale, a ua le taofia ai le tagata ua moni lona loto i le Alii ma lona valaauina. Fai mai lana upu: "A ou alu atu lava ou te oti ai i Samoa, oti ai pea ia." Ua ia faatu se matati'a ua avea ma lu'i i tina o nei auga tupulaga ma tagata foi o le EFKS o e ua faigofie ona faavaivai ma pala'a'ai.

O le sauniga a ona 'aiga na faia i le Aso Lulu 12 Oketopa 2016 i le 6 i le afiafi, i le Ballard Family Moanalua Mortuary, Honolulu; ma ta'ita'iina lava e le Susuga i le Toeaina ia Iosefa.

O lona toe sauniga na faia i le Aso Faraile 14 Oketopa 2016, i le Filipino United Church of Christ, Waipahu i le 10.30 i le taeao. O le Susuga i le Toeaina o le Pulega i Sisifo ia Tinetali Gafa FT, na ta'ita'i; o le failautusi o le Pulega i Sasa'e ia Galuefa Leilua FS na saunia tatalo; o le Susuga ia Peniamina Filivaa FS na faitauina le Tusi Paia, a o le Susuga i le

Failautusi o le Matagaluega ia Fuamaila Jr Soa FS na saunia le lauga ma le faamafanafanaga.

Na lagiina lava e si ana aufaipese ia pese o le sauniga, ma faaiu i lona oliolisaga tumau i le Hawaii State Veterans Cemetery, Kaneohe, i le 2pm. Na feagai lava le Susuga ia Aneki Tui FT ma lona falelauasiga, ma faamavae atu ai i si ona faletua pele.

O faaaloaloga a le aulotu ma aiga ona o pelega o le maliu o Tasele na faia i le fanua o le EFKS i Honolulu.

"Ona fai atu ai lea o lona Alii ia te ia, ua lelei ia, le auaua lelei e ma le faamaoni, ua e faamaoni i nai mea itiiti, ou te tofia oe e pule i mea e tele; ina ulufale mai ia i le fiafia o lou Alii." - Mataio 25:21.

Ia tumau le agalelei o le Alii i le Susuga i le Toeaina ma le nofoaalo ma aiga, faapea le aulotu a Vaipuna o le Ola. A ia tafimala le malaga a le faletua, le tina ma le toa o le Tala Lelei ia Tasele Petaia Iosefa Aneki Tui.

Saunia e

Galuefa Leilua FS (Failautusi o le Pulega), mo Iosefa A. Tui FT, ma le fanau ma le Ekalesia Vaipuna o le Ola, Hawaii.

GREAT TEACHER

A great teacher is not simply one who imparts knowledge to his students, but one who awakens their interest in it and makes them eager to pursue it for themselves. He is a spark plug, not a fuel pipe.

- M.J. Berrill
